



Broj: UP-I-KSI-09-4/23

Datum: 17.05.2023. godine

Na osnovu člana 25. i 33. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“ broj: 19/21), postupajući po službenoj dužnosti, u predmetu utvrđivanja postojanja povrede odredaba navedenog Zakona od strane D. J. iz Brčkog, [REDACTED], koji je obavljao funkciju zamjenika direktora JP „Komunalno Brčko“ d.o.o. Brčko distrikt BiH, na 56. sjednici održanoj dana 26.05.2023. godine, donosi

## RJEŠENJE

- I. **UTVRĐUJE SE** da je D. J., iz Brčkog, [REDACTED], koji je obavljao funkciju zamjenika direktora JP „Komunalno Brčko“ d.o.o. Brčko distrikt BiH, postupio protivno članu 19. stav (1) i stav (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da dana 12.01.2022. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II Komisiji za odlučivanje o sukobu interesa nije prijavio svoju nepokretnu kao i pokretnu imovinu vrijednosti veće od 5.000,00 KM.
- II. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, D. J. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

## Obrazloženje

Komisija za odlučivanje o sukobu interesa je po službenoj dužnosti zaključkom, broj: UP-I-KSI-09-4/23 od 17.01.2023. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije D. J., zamjenika direktora JP „Komunalno Brčko“ d.o.o. Brčko distrikt BiH, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 12.01.2022. godine Komisiji za odlučivanje o sukobu interesa i podataka prikupljenih od nadležnih organa i institucija o nekretninama nosioca javne funkcije, jer nosilac javne funkcije nije prijavio, odnosno u Izvještaj o imovinskom stanju nije tačno i potpuno unio podatke o nepokretnoj imovini, tačnije:

- nekretnina označena kao parcela broj: 383, „DO“ u ukupnoj površini od 5278m<sup>2</sup>, koja se sastoji od: njiva 5. klase u površini od 2706 m<sup>2</sup> i njiva 6. klase u površini od 2572 m<sup>2</sup>, sve upisane u Zk. Uložak broj: 25, za k.o. Zovik Donji, suvlasništvo D. J. sa dijelom od

1/2, nosilac javne funkcije, čime je postupio protivno članu 19. stav (1) i (2) i članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Osim toga, uočena je nesaglasnost između prijavljene imovine u Izvještaju o imovinskom stanju-Aneks II i podataka dobijenih od strane Odjeljenja za javni registar Vlade Brčko distrikta Bosne i Hercegovine broj: [REDACTED], na način da nije u Izvještaj o imovinskom stanju unesen L3 – motocikl, marka: Jajue, tip: [REDACTED], registarske oznake: [REDACTED], godina proizvodnje: 2019, vlasništvo D. J..

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-4/23 od 17.01.2023. godine, zaprimljen 24.01.2023. godine, D. J., zamjenik direktora JP „Komunalno Brčko“ d.o.o. Brčko distrikt BiH je dana 02.02.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da motocikl nije registrovan i nije u upotrebi, te smatra da nema vrijednost veću od 5.000,00 KM. Takođe, je naveo da se zemljište vodi sa 1/2 kao suvlasništvo sa V. Z. iz Zovika i da je V. Z. darovnim ugovorom dodijelio D. J. polovinu te parcele. Nadalje navodi, da mu zemljište nije donosilo prihod te je navedena parcela 6. klase za koju niko nije zainteresovan i koja je godinama prazna i bez upotrebe.

D. J. je obnašao funkciju zamjenika direktora JP „Komunalno Brčko“ d.o.o. Brčko distrikt BiH, na osnovu Odluke broj: [REDACTED] na osnovu Odluke o prestanku radnog odnosa broj: [REDACTED], te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine bio nosilac javne funkcije upisan u Registar javnih funkcija i nosilaca javnih funkcija.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu.

Uvidom u dopis Osnovnog suda Brčko distrikta Bosne i Hercegovine, Registra zemljišta broj: 096-0-RZ-22-003431 od 03.10.2022. godine, utvrđeno je da je predmetna nekretnina u Zemljišnoknjižnom izvodu broj 25., upisana njiva 5. i 6. klase u ukupnoj površini od 5278 m<sup>2</sup>, u suvlasništvu D. J. sa udjelom od 1/2.

Uvidom u dopis Odjeljenja za javni registar Vlade Brčko distrikta Bosne i Hercegovine broj: [REDACTED], utvrđeno je da je L3 – motocikl, marke: Jajue, tip: [REDACTED], registarske oznake: [REDACTED], godina proizvodnje: 2019, vlasništvo D. J., nosilac javne funkcije.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da D. J. nije u Izvještaju o

imovinskom stanju podnesenom 12.01.2022. godine Komisiji za odlučivanje o sukobu interesa unio podatke o vlasništvu nad navedenom nekretninom kao i podatke o vlasništvu nad gore navedenim motociklom, čime je postupio protivno odredbi člana 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi bila izrečena sankcija koja odgovara učinjenoj povredi Zakona. Vodila je računa o težini i posljedicama povrede Zakona, te činjenici da je D. J., nosilac javne funkcije, predao Izvještaj o imovinskom stanju za 2022. godinu u kojem je upisao podatke o predmetnoj nepokretnoj imovini, kao i na navode iz Izjašnjenja da navedeni motocikl ne prelazi vrijednost veću od 5.000,00 KM, Komisija je tom navodu poklonila vjeru, jer se radi o malom motociklu. Komisija je cijenila činjenicu da je D. J. propustio Komisiji prijaviti navedenu nekretninu u svom vlasništvu, da je nekretnina manje vrijednosti. Takođe, Komisija je cijenila njegovo postupanje i odgovornost, ličnost nosioca javne funkcije, odnos imenovanog prema kršenju odredaba Zakona kao i opredijeljenosti imenovanog da postupi u skladu sa Zakonom, te otkloni razloge koji su doveli do kršenja odredaba Zakona kao i prouzrokovanoj posljedici. Cijeneći gore navedeno u konkretnom slučaju radi se o očito lakšem obliku kršenja odredaba Zakona, koje nisu nanijele štetu integritetu javne funkcije koju je D. J. obavljao, Komisija je stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

#### POUKA O PRAVNOM LIJEKU

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali stranka može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik  
Komisije za odlučivanje o sukobu interesa

Admira Mujić, dipl. pravnik

Dostavljeno:

1. [REDACTED],
2. Internet stranici Komisije,
3. Evidenciji i
4. Arhivi.